



#### EDITORIAL

## Tutulan ang panghihimasok militar at tumitinding pang-uupat ng gera ng US

**L**along nalalantad ang huwad na kasarinlan ng Pilipinas sa harap ng lumalakas na panghihimasok militar ng imperyalismong US. Estrategikong layunin ng US ang pahigpitin ang dominasyon at kontrol sa bansa at gamitin itong lunsaran ng pang-uupat ng gera sa karibal na imperyalistang China sa Asia-Pacific.

May dalawang tampok na aspeto ngayon ang tumitinding panghihimasok militar ng US sa Pilipinas: una, ang pagtutulak nitong palakas ang presensya ng mga tropang Amerikano at pagpupwesto ng mga sandatang militar upang gamitin ang bansa na base o *outpost* ng militar, karugtong ng lambat ng mga base militar nito sa Asia-Pacific; at ikalawa, ang pagpapalaki nito ng ayudang militar sa pinaigting na gerang panunupil laban sa mga pwersang rebolusyonaryo at progresibo na nagbabandila ng pakikibaka para sa pambansang kalayaan.

Sa dalawang aspetong ito, ang Armed Forces of the Philippines (AFP) ang pangunahing instrumento ng US. Ito ang haligi ng dominasyon at panghihimasok ng US sa Pilipinas.

Ang AFP ay binuo, hinulma at sinamay alinsunod sa doktrina ng imperyalismong US at mula't sapul ay ginagamit para panatilihin ang neokoloniyal na estado sa bansa. Sa nagdaang mga dekada, pinanatili itong nakatali sa ayuda at payong ng militar ng US, hindi nakatitindig sa sariling paa at walang kakayahang ipagtanggol ang teritoryo ng bansa laluna sa harap ng agresyong China.

Pinatampok ng kamakailang pagbisita ni US Vice President Kamala Harris ang huwad na kasarinlan ng bansa. Ginamit niya ang pagiging palaasa ng AFP at ng rehimeng Marcos sa ayuda ng US para palabasin na kailangan ang presensyang militar ng US sa Pilipinas para ipagtanggol ito laban sa mga banta ng China. Ginamit din ni Harris ang

pagbisita upang itulak ang paggamit ng enerhiyang nukleyar na pakikibangan ng mga kapitalistang Amerikano at lalong maglulubog sa Pilipinas sa dayuhang pautang.

Kasabay nito, ginamit ni Harris ang Pilipinas, laluna nang nagtungo siya sa Palawan, pinakamalapit sa mga pasilidad militar ng China na nasa saklaw ng teritoryong pandagat ng Pilipinas, para painitin ang tensyon sa China na tinuligsa niya sa "iresponsableng kilos" sa South China Sea.

Itinulak ni Harris ang hinihingi ng US na karagdagang limang lugar para magtayo ng mga pasilidad ng US sa ilalim ng Enhanced Defense Cooperation Agreement (EDCA). Sa kasalukuyan, mayroon nang mga pasilidad militar ang US sa loob ng mga kampo ng AFP sa Basa Air Base sa Pampanga, Fort Magsaysay sa Nueva Ecija, Lumbia Air Base sa Cagayan de Oro, Antonio Bautista Air Base sa Palawan at sa Benito Ebuen Air Base sa Mactan, Cebu.

Kaagad naman pinaunlakan ng

rehimeng Marcos ang hinihingi ng US nang ianunsyo ng AFP na pabor itong ibukas ang mga kampo nito sa dalawang lugar sa Cagayan, at tig-isa sa Palawan, Zambales at Isabela, mga lugar na susi sa estratehiya ng US na kontrahin ang paglakas at paglawak ng lakas militar ng China. Malinaw na gustong tatadtarin ng US ng mga pasilidad militar ang bansa. Tahasang binubura ang pangkaysaysayang pakikibaka at tagumpay ng sambayanang Pilipino sa pagpapataks sa mga base militar ng US.

Ang pagbisita ni Harris ay bahagi ng tuluy-tuloy na pagpapakulo ng US sa armadong tensyon sa Asia-Pacific. Bago sa Pilipinas, nagtungo rin si Harris sa Japan at South Korea, para magpasiklab ng lakas militar sa mga baseng militar ng US sa mga bansang iyon, na sinagot naman kapwa ng China at North Korea ng sariling pagpapakitang-gilas. Ilang buwan lang ang nakaraan nang nagtungo si US Speaker Nancy Pelosi sa Taiwan para sabihing ito'y "dedepensahan ng US" na tuwirang sampal sa China at sa matagal nang pagkilala sa patakarang "One China."

Ang pagpapainit ng US ng sitwasyong militar sa Asia-Pacific ay karugtong din ng tuluy-tuloy na paggatong nito at ng alyansang NATO (North Atlantic Treaty Orga-

nization) ng gera sa Ukraine laban sa Russia. Katunayan, sa tulak ng US, naglabas na rin ang NATO (na nakasentro pangunahin sa Europe) ng paninindigang anti-China. Sobra-sobrang tubo ang kinakamkam ng malalaking kapitalista sa industriyang militar ng US at mga al-yado nitong bansa sa tuluy-tuloy na pang-uupat nito ng gera at pagbenta ng mga armas.

Upang ibayong palakasin ang kapangyarihan nito sa Pilipinas, tuluy-tuloy rin na binibigyan ng US ng ayuda ang AFP para sa pagsupil sa mga rebolusyonaryo at patriyotikong pwersang tutol sa dominasyon at kontrol ng imperyalismong US sa bansa. Pinapayuhan, sinasanay, pinopondohan at inaarmasan ng US ang AFP para isagawa ang brutal na gerang kontra-insurhensya laban sa sambayanang Pilipino at sa kanilang mga rebolusyonaryong pwersa.

Todo-larga ngayon ang malawakang paghahasik ng terorismo ng estado sa buong bansa sa anyo ng mga pagmasaker at pagpatay, pagtortyur at pagkukulong sa mga pinaghihinang sumusuporta sa Bagong Hukbong Bayan. Nagkakamal ng limpak-limpak na tubo ang mga kapitalista sa pagsuplay ng US ng mga drone, eroplano at kanyon para isagawa ang pambobomba sa mga komunidad,




bukid at kagubatan. Sa pamamagitan ng AFP at ng pasistang NTF-Elcac, at sa ilang pagkakatao'y sa tuwirang panghihimasok sa mga operasyon, muling ipinatutupad ng US ang mga taktika ng malawakang terorismo na ginamit nito sa bigong gera sa Vietnam. Ginagamit ang Anti-Terror Law (nakapadron sa mapanghihimasok na "gera kontra terorismo" ng US) para gupuin ang mga pwersang patriyotiko at progresibo, at hadlangan ang usapang pangkapayapaan.

Tuwiran ang responsibilidad ng imperyalismong US sa malalalang paglabag sa karapatang-tao at krimen sa digma ng AFP. Duguan ang kamay ng US, ni Marcos at ng AFP sa walang-pakundangang pasistang paninibasib laban sa sambayanang Pilipino. Dapat silang singilin at pagbayarin.

Ang nagpapatuloy na krisis ng pandaigdigang sistemang kapitalista, partikular na ang muling pagsadsad sa resesyon ng ekonomya ng US, ay lalong magtutulak dito na pahigpitin ang hegemonya at kontrol nito sa mga bansa at rehiyong pinagkukunan ng mga likas na rekurso, pinaglalagakan ng sobrang kapital at mga estratehikong ruta sa internasyunal na kalakalan. Kabilang dito ang kontrol ng imperyalismong US sa Pilipinas.

Dapat labanan ng sambayanang Pilipino ang panghihimasok militar ng US, panunulsol ng inter-imperyalistang gera, at panggagatong ng pasistang terorismo sa bansa. Dapat ipabasura ang mga kasunduang nagtatali ng Pilipinas sa US at nagbibigay sa mga tropang Amerikano ng labis na karapatan para gamitin ang bansa para sa kanilang estratehikong interes. Dapat makipagkaisa ang mga Pilipino sa iba't ibang mamamayan sa iba't ibang panig ng mundo laban sa imperyalismo at imperyalistang gera.

Dapat makibaka ang sambayanang Pilipino para wakasan ang paghahari ng imperyalismong US sa militar, ekonomya, pulitika at kultura sa Pilipinas. Ito ang susing nilalaman ng pakikibaka para sa pambansang demokrasya.

<div></div> <div>Tomo LIII Blg. 23   Disyembre 7, 2022</div> <div>Ang Ang Bayan ay inilalabas sa wikang Pilipino, Bisaya, Iloco, Hiligaynon, Waray, Ingles at Espanyol. Tumatanggap ang Ang Bayan ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikauunlad ng ating pahayagan.</div>	
<div>Ang Ang Bayan ay inilalathala dalawang beses bawat buwan ng Komite Sentral ng Partido Komunista ng Pilipinas</div>	
<div> ang.bayan@cpp.ph</div>	<div> @angbayan1969</div>

# Ang militaristang estratehiyang Biden-Harris sa Asia-Pacific

Walang pinag-iba sa porma, layunin at esensya ang estratehiyang geopolitikal ng imperyalismong US sa ilalim ng nagdaang gubyerno ni Donald Trump o ng kasalukuyang gubyernong Biden-Harris. Pagpapatuloy ito ng nauna pang "pihit sa Asia" na idineklara noong 2008 na estratehikong pagpihit ng patakaran sa China at pagturing dito bilang isang nangungunang imperyalistang karibal. Pinakapakay ng estratehiyang militar na ito ang pigilan ang ibayo pang paglawak ng pangmilitar na lakas at impluwensyang pampolitika ng China, at maghanda sa at mag-udyok ng tuwiran o di tuwirang digmaang inter-imperyalista.

Sa ilalim ng tinaguriang "Indo-Pacific Strategy," kinokonsolida ng US ang kapangyarihang militar nito sa mga bansa sa palibot ng China sa pamamagitan ng mga pormasyong Quad (Quadrilateral Security Dialogue, kasama ang India, Japan at Australia) at AUKUS (Australia-United Kingdom-US), kasabay ng pagpapahigpit ng kontrol sa mga papet nitong militar sa South Korea, Thailand, Pilipinas at pati sa Japan. Inuudyok din ng US ang mga alyado nito sa North Atlantic Treaty Organization (NATO) sa Europe na manindigan kontra sa China.

Naghuugis ang estratehiyang ito sa paglulunsad ng masinsin at malakihang mga "military drill" sa iba't ibang bansa sa palibot ng China at ng paglalayag ng mga barkong pandigma ng US sa South China Sea at Taiwan Strait. Pagsasanay ang mga ito sa maniobrang pangkombat ng US sa tarangkahan mismo ng China. Kasabay nito ang mapangudyok na mga hakbang ng US tulad ng sunud-sunod na pagbisita ni US House Speaker Nancy Pelosi at iba

pang upisyal sa Taiwan noong Agosto, at ng pamamayagpag ni US Vice President Kamala Harris sa South at Southeast Asia.

Sinasabing "pinakamalalaki sa kasaysayan" ang ginanap na *military drill* ngayong taon sa Japan (Keen Sword, 36,000 tropa) at South Korea (Ulchi Freedom Shield, mahigit 67,500 tropa). Ginanap din ang katulad na mga pagsasanay sa Thailand (CARAT), Indonesia (Garuda Shield), Australia (Cope North), Guam (Valiant Shield) at iba pang teritoryong isla ng US sa Pacific. Sa Pilipinas, inilunsad ang Balikatan noong Marso-Abril na nilahukan ng 8,900 tropa.

Noong Hunyo-Agosto, ginanap ang 11-araw na Rim of the Pacific (RimPac), ang pinakamalaking *combat drill* sa mundo, na inilunsad sa iba't ibang bahagi ng Pacific mula sa base militar ng US sa Hawaii. Uma-bot sa 38 barkong pandigma, apat na submarino, siyam na hukbong pangkati, mahigit 170 *aircraft* at 25,000 tropa mula sa 26 bansa ang lumahok sa pagsasanay. Walo sa mga bansang ito ay kasapi ng NA-

TO, na nasa likod ng gerang *proxy* ng US sa Ukraine laban sa Russia.


Libu-libo ring maliit, katamtamang-laki at di-inaanunsyong pagsasanay militar ang isinasagawa ng US sa "lahat ng sulok" ng Asia-Pacific. Sangkot dito ang daan-daang eroplano ng pambomba, mga barkong denuklear, mga kanyon, misayl, bala at tropa na madalas nagsasagawa ng mga "live-fire exercise" na nag-iwan ng nakalalasong basura at kemikal sa tubig, hangin at lupa. Sa Pilipinas lamang, humigit-kumulang 300 ang gayong pagsasanay kada taon.

## Kontrol sa karagatan

Noong Setyembre, inianunsyo ng US ang pagkakabuo ng Task Force 76/3, na kumbinasyon ng mga pwersang nabal ng US Indo-Pacific Command na permanenteng nakaistasyon sa South China Sea. Layunin nitong pahigpitin ang kontrol ng US sa mga pasilidad, base at tropang nabal sa mga bansa sa South, East at Southeast Asia sa tabing ng "integrasyon" at "inter-operability." Inilunsad nito noong Oktubre ang Kamandag 2022 sa Bataan, Palawan at iba pang lugar sa Luzon.

Bagong mekanismo ito sa ilalim ng Pacific Deterrence Initiative ng Pentagon na may \$5.1 bilyong badyet ngayong taon. Layunin ng programang ito na maglatag ng mga pasilidad sa mga bansa sa "first island chain" (Japan, Taiwan, Pilipinas, at iba pa), upang dikitan at permanenteng palibutan ang China ng mga "long-range missile" na nakabase sa lupa (*land-based*).

Nang bumisita si Harris sa Pilipinas noong Nobyembre, adyenda niya ang pagpinal sa dagdag na limang base na gagamitin ng US sa bansa. Tampok dito ang balak na muling pagtatayo ng mga pasilidad militar ng US sa Subic, Zambales para ipwesto ang mga pwersa, misayl at barkong pandigma ng US, mahigit 30 taon matapos sipain sila mula rito. **AB**



# Armadong pakikibaka laban sa paghaharing militar sa Masbate

**I**niulat ng Bagong Hukbong Bayan-Masbate (Jose Rapsing Command) nitong Disyembre ang higit 17 aksyong militar na inilunsad ng mga yunit nito laban sa militar at pulis sa prubinsya nitong 2022. Bahagi ang mga ito ng patuloy na kampanya ng BHB-Masbate para ipawalangsaysay at biguin ang mga nakapokus na operasyong militar at kampanyang golpe-de-gulat ng Joint Task Force Bicolandia sa prubinsya. Hindi bababa sa limang batalyong pwersa ng AFP-PNP-CAFGU ang ipinakat sa prubinsya na umabot pa nga sa higit 1,500 pwersa para maglunsad ng gayong mga operasyon at kasabay na militarisasyon ng mga komunidad sa ilalim ng RCSP (Retooled Community Support Program).

Kabilang sa mga aksyong ito ang ambus sa Barangay Manlut-od sa Placer kung saan dalawang CAFGU ang napatay at nakasamsam ang BHB ng dalawang maiiksing armas, mga magasin, bala at iba pang kagamitan noong Nobyembre 7.

Apat sa mga opensiba ay nai-lunsad sa unang 100 araw ng bagong rehimeng Marcos sa poder. Labing-isang sundalo ang napatay at lima ang nasugatan sa mga opensibang ito.

Kabilang rito ang ilinunsad na aksyong demolisyon noong Agosto 11 laban sa 2nd IB sa Sityo Puro, Talisay, San Fernando sa isla ng Ticao. Lima ang napatay at tatlo ang sugatan sa kaaway sa naturang

aksyon. Lima rin ang napatay sa aksyong isnayp-haras laban sa armadong grupo ni kapitan ng barangay na si Adriel “Boyet” Besana, CAFGU at 2nd IB sa Sityo Baldoza, Cabunghayan, Cawayan, Masbate noong Agosto 18.

Bahagi rin ang naturang mga opensiba sa pagpupursige ng Pulang Hukbo na ipagtanggol at patatagin ang determinasyon ng masang Masbatenyo na kumilos at labanan ang nagpapatuloy na paghaharing militar sa Masbate. Sa ilalim ng rehimeng Marcos, nagbabanta ang mas agresibong pasistang pang-aatake ng AFP-PNP-CAFGU at ng Masbate TF-Elcac sa magsasakang Masbatenyo.

Nagsimula na ang kampanya ng militar at lokal na naghaharing-uri sa malawakang pag-agaw sa mga dating rantso at asyendang napagtagumpayang mabawi ng kilusang magsasaka. Umaabot na sa 11 ang naitalang biktima ng pampulitikang pagpaslang sa prubinsya. Kabilang dito ang serye ng pagpatay sa mga magsasakang nagbubungkal sa loob at paligid ng lupaing Pecson na pinag-iinteresang lokal na bukrurata sa prubinsya sa ilalim ni Marcos. Pinakabagong kaso ay ang pagpatay sa magkokoprang si Ronnie Andren sa bayan ng Placer noong Nobyembre 27. Dinakip siya habang nagkokopra at saka pinatay.

Ayon kay Luz del Mar, tagapagsalita ng BHB-Masbate, hindi titigil ang hukbong bayan sa pagtanggol sa masang Masbatenyo laban sa karahasang militar at sa pagpapanagot sa AFP-PNP-CAFGU sa mga krimen nito laban sa bayan. Inihayag niya ang kahandaan ng BHB na patuloy na labanan ang tumitinding pasismo at terorismo ng estado sa Masbate. AB

## 6 na aksyong militar, inilunsad sa Negros at Bukidnon

**A**nim na aksyong militar sa nagdaang dalawang linggo ang inilunsad ng Bagong Hukbong Bayan (BHB) laban sa mga pasistang tropang militar. Inilunsad ang mga aksyong ito sa gitna ng mga *focus military operation* ng AFP.

Sa Sipalay City, nasamsam ng BHB-Southwest Negros ang dalawang kalibre .45 pistola, mga bala, tatlong magasin, dalawang selpon at isang granada sa ambus nito sa dalawang ahenteng intel ng 47th IB sa Sityo Cambogiot, Barangay Camindangan noong Nobyembre 24. Napatay ang dalawang sundalo na pangunahing sangkot sa gawaing paniktik at panunupil sa masa.

Ayon kay Andrea Guerrero, tagapagsalita ng BHB-Southwest Negros, magsisilbing babala ang armadong aksyon sa lahat ng espiya at aset ng AFP at PNP.

Pinaputukan ng BHB-Central Negros ang PNP *substation* sa Sityo Parkingan, Barangay Trinidad, Guihulngan City noong Nobyembre 25. Isang pulis ang nasugatan. Bago nito, pinaputukan ng BHB ang dalawang

magkaibang yunit ng 62nd IB sa Sityo Tuko sa naturang barangay noong Nobyembre 21. Dalawang sundalo ang napatay at isa ang nasugatan.

Sa parehong syudad, pinaputukan ng BHB ang Army Patrol Base sa Barangay Sandayao noong Nobyembre 23. Isang sundalo ng 62nd IB ang nasugatan.

Sa Bukidnon, pinaputukan ng BHB ang nag-ooperasyong tropa ng 8th IB sa Purok 8, St. Peter, Malaybalay City noong Nobyembre 16. Isang sundalo ang napatay sa armadong aksyon. AB

# Magsasaka sa Negros, pinatay sa harap ng kanyang mag-iina

**M**agkakasunod ang mga kaso ng paglabag sa karapatang-tao ng rehimeng Marcos sa nagdaang mga linggo. Kabilang dito ang pagpatay sa isang magsasaka, pambobomba at pag-istraping sa komunidad, at arbitraryong pag-aresto sa mga sibilyan.

Pinaslang ng tropa ng 62nd IB ang magsasakang si Victor Baldonado sa kanyang bahay sa Sityo Columbia, Barangay Trinidad, Guihulngan City, Negros Oriental noong Nobyembre 21, ala-6 ng umaga. Binaril siya ng mga sundalo sa harap ng kanyang asawa at mga anak.

Pinalalabas ng 62nd IB na mandirigma ng Bagong Hukbong Bayan (BHB) si Baldonado at na napatay siya sa isang armadong engkwentro. Binihisan ng mga sundalo ang kanyang bangkay at tinabihan ng mga armas at mga dokumento para bigyang katwiran ang krimen.

**Pag-aresto.** Sa Negros Occidental, arbitraryong inaresto ng 62nd IB sina Wilben Callura at Juliet Callura, mga residente ng Sityo Binataan, Barangay Quinten Remo, Moises Padilla. Kasabay nito, inistraping ng tropa ng militar ang bahay ni Virgie Perolino, Roberto Gario at Jorenda Callura sa parehong sityo. Ninakaw din ang kanilang mga manok at kinatay ang alagang baboy. Dulot nito, lumikas ang 800 magsasaka mula sa sityo Oway-uway, Binataan at iba pang kalapit na komunidad.

Noong Nobyembre 25, niransak ng mga sundalo ng 62nd IB at 33rd DRC ang kabahayan sa Sityo Ngalan sa parehong barangay. Sapilitang pinasok at hinalughog ang bahay nina Zaldy Jimenez, Richard Jimenez, Robert Jimenez, Cardo Juanites at Sernel Juanites. Namalagi sa naturang mga bahay ang mga sundalo mula Nobyembre 25 hanggang 28.

Inaresto ang unyonistang si Roel Duyag noong Nobyembre 25 sa Butuan City habang nasa lamay ng kanyang ina. Koordineytor siya ng Kilusang Mayo Uno sa rehiyong Caraga. Dinala siya sa Butuan PNP Station 1 at sinampahan ng gawa-gawang mga kasong bigong pagpatay.

**Pambobomba at istraping.** Niyanig ng mga *rocket* at bala ang Purok 8, St. Peter, Malaybalay City, Bukidnon noong Nobyembre 16 matapos bombahin at paulanan ng bala ang komunidad ng 8th IB. Ganting-salakay ito ng militar matapos mapatamaan sila ng BHB sa dalawang armadong insidente. Nagpakawala ng 16 na *rocket* at walong beses na nang-istraping ang helikopter na MD520. Umabot sa 40 minuto ang unang ronda.

Nagkandarapa sa pagtakbo ang mga residente dahil napakalapit sa kanilang komunidad ibinagsak ang mga bomba. Nagsidapa ang mga titser at mga estudyante sa kanilang mga klasrum habang paikot-ikot ang mga helikopter sa taas ng kanilang baryo.

**Pamamaril.** Limang sibilyang mangangaso ang pinagbabaril ng tropa ng 24h IB sa magubat na bahagi ng Sitio Sap-al, Barangay Buneg, Lacub, Abra noong Nobyembre 27.

Dalawang magsasaka ang nasugatan sa insidente habang ang tatlo ay nakatakbo tungo sa kalapit na komunidad para humingi ng saklolo.

Nakasalubong ng mga sundalo ang lima habang nagpapahinga. Agad nilang itinaas ang kanilang armas na gamit sa pangangaso at sumigaw ng “sibilyan kami!” para hindi sila paputukan ng mga sundalo. Sa kabila nito, nagpaputok pa rin ang mga sundalo.

**Pambubuwag.** Marahas na binuwag noong Nobyembre 25 ng mga pulis at gwardya ang piket ng mga manggagawa ng Manila Harbour Center sa Road 10, Manila City. Winasak nila ang katatayo pa lamang na kubol ng mga manggagawa at kanilang tagasuportang kabataan. Iginigiit ng mga manggagawa ang kagyat na pagpapabalik sa trabaho at pagregularisa sa 370 manggagawang iligal na tinanggal noong 2020. **AB**



**Harris, alis!** Sinalubong ng protesta ng mahigit 500 katao ang pagdating ni US VP Kamala Harris sa Pilipinas noong Nobyembre 20. Nagmartsa sila patungong Mendiola sa araw ng pakikipagpulong ni Harris kay Ferdinand Marcos Jr sa Malacañang.

**KM, 58 taon.** Isang raling iglap ang inilunsad ng mahigit 100 kabataan noong Nobyembre 27 sa Recto Avenue sa Maynila bilang pagdiriwang sa ika-58 anibersaryo ng KM noong Nobyembre 30. Naglunsad sila ng maiksing programa at nag-iwan ng istrimer kung saan nakasulat ang “Mabuhay ang CPP-NPA-NDF! Kabataan, tumungo sa kanayunan! Sumapi sa New People’s Army!”

**Masapa, 44!** Nagraling-iglap ang may ilampung manggagawang pangkalusugan noong Disyembre 6 sa Carriedo Avenue sa Maynila bilang paunang paggunita sa ika-44 anibersaryo ng Makabayang Samahang Pangkalusugan. Panawagan nila sa mga manggagawang pangkalusugan na sumapi sa hukbong bayan.

**Mga unyonista, palayain!** Nagpiket noong Disyembre 6 sa Quezon City Hall of Justice at Manila City Regional Trial Court, ang mga tagasuporta at kaanak ng mga unyonistang sina Romina Astudillo, Mark Ryan Cruz, Jaymie Gregorio Jr., at Joel Demate para ipanawagan ang kagyat na pagpapalaya sa kanila. Kabilang sila sa Human Rights Day 7 na inaresto noong Disyembre 10, 2020.

# Nobyembre 30: Araw ni Bonifacio at ng masang anakpawis

Nagmartsa mula Liwasang Bonifacio patungo sa paanan ng Mendiola Bridge sa Maynila ang mga manggagawa, maralitang-lunsod at iba pang mga sektor bilang paggunita sa ika-159 Araw ni Andres Bonifacio na idineklara rin nilang Araw ng Masang Anakpawis. Kasamang nagmartsa ang Kilusang Mayo Uno at All Workers Unity, Bayan at mga organisasyon sa ilalim nito, at ang Nagkaisa at Paggawa sa ilalim ng United Labor. Tinatayang umabot sa 6,000 katao ang lumahok sa pagkilos.

Panawagan nila ang pagtataas ng sahod, at pagbaba ng presyo ng mga bilihin. Sa ngayon, inilagay nila sa ₱1,100 kada araw ang nakabubuhay na sahod sa pribadong sektor at ₱33,000 kada buwan para sa mga kawani ng guberno.

Sa Baguio City, nagmartsa ang iba't ibang sektor mula Sunshine Park tungong Igorot Park. Nagprotesta rin ang iba't ibang grupong demokratiko, kasama ang kabataan, sa Crossing, Calamba sa Laguna.

Hindi nagpatinag sa malakas na ulan ang mga raliyista na nagtipon sa Freedom Park sa Davao City. Nagdaos rin ng rali sa Carbon Free

Market Freedom Park sa Cebu City, Iloilo City at sa Fountain of Justice sa Bacolod City.

Nagsagawa ng *noise barrage* sa harap ng Department of Health ang Alliance of Health Workers noong Nobyembre 24. Panawagan nila, itaas tungong ₱33,000 ang "entry-level" na sweldo ng mga manggagawang pangkalusugan sa pribado at pampublikong sektor. Nagkaroon ng kasabay na pagkilos sa mga ospital sa Baguio City, Bacolod City at sa Manapla, Negros Occidental.

Noong Nobyembre 22, nagtipon sa Quezon City ang anim na malala-



king pederasyon at organisasyon ng mga kawani ng guberno para ipanawagan ang pagtaas ang minimum na sweldo ng mga kawani tungong ₱33,000.

Samantala, naigiit ng unyon ng mga manggagawa ng Technol Eight Philippines noong Nobyembre 24 ang dagdag-sahod sa pakikipagne-gosasyon nila sa kumpanya. Kasama sa naipagtagumpay nilang CBA ang ₱50 dagdag-sahod kada araw sa loob ng 2 taon, bonus na ₱30,000, libreng bigas at *union leave*.

AB

## Konsultant ng NDF at lider-magsasaka, pinaslang ng militar

Pinatay ng mga elemento ng 94th IB at 47th IB sina Ericson Acosta at Joseph Jimenez noong Nobyembre 30 sa Sityo Makilo, Barangay Camansi, Kanbankalan City, Negros Occidental. Si Acosta ay konsultant ng National Democratic Front (NDF) sa usapang pangkapayapaan habang si Joseph Jimenez ay lokal na organisador ng Kilusang Magbubukid ng Pilipinas at upisyal ng lokal na samahang magsasaka sa Barangay Camansi. Dinakip ang dalawa bandang alas-dos ng madaling araw, pero pinalabas na napatay sa isang engkwentro kinaumagahan.

Si Acosta ay isang kilalang makata, manunulat at komposer ng kanta. Kinilala siya ng Partido na isa sa importanteng kadre at mandirigma sa Negros. Naging bahagi siya ng panel ng NDFP na naghanda sa Comprehensive Agreement on Social and Economic Reforms (CASER) sa pormal na usapang pangkapayapaan noong 2016.

Ayon sa paunang mga ulat ng September 21 Movement, para pabalasing mayroong engkwentro sa lugar, pinaulanan ng bala ng mga sundalo ang bahay ni Ronald

Francisco, kung saan nagpapahinga sina Acosta. Matapos nito, kinuha si Francisco, kanyang asawa at tatlo nilang anak at dinala sa kampo ng militar.

Noong Nobyembre 30, sa araw mismo na naibalita ang kanilang pagkamatay, nagtipon ang mga demokratikong organisasyon sa harap ng Commission on Human Rights para kundenahin ang pagpaslang sa dalawa.

### Dalawa pang biktima

Pinatay din ng tropa ng 62nd

IB, imbes na lapatan ng paunang lunas, ang dalawang sugatang Pulang mandirigma sa Sityo Binataan, Quinten Remo, Moises Padilla noong Nobyembre 28. Nasugatan sina Mario Baldusa (Ka Jekoy) at Janhel Sarsa (Ka Jorge) sa isang engkwentro umaga ng araw na iyon.

Imbes na gamutin, alamin ang pagkakakilanlan, at ideklarang bihag ng digma, tuluyang pinatay ng 62nd IB ang dalawa.

Dagdag ang apat sa higit 100 rebolusyonaryo at sibilyang wala sa katayuang lumaban na sadyang pinaslang ng militar mula 2017 hanggang sa kasalukuyan. Taliwas ang pagpatay sa kanila sa mga tuntunin ng makataong pakikidigma at sa mga proteksyong taglay ng mga indibidwal sa ilalim ng CARHRIHL at mga Geneva Conventions.

AB

# Pang-aagaw ng lupa sa Isabela sa tabing ng kaunlaran

Mayaman sa rekursong dagat at lupa ang bayan ng Divilacan, isang lugar sa prubinsya ng Isabela na nakasandig sa Sierra Madre at nakatanaw sa Pacific Ocean. Mayroon itong 12 barangay at halos 6,000 residente. May lawak itong 89,000 ektarya. Malaking bahagi ng bayan ay maituturing na lupaing ninuno ng katutubong Dumagat at Agta. Idineklara itong munisipalidad noong 1969.

Sa likod ng inilalakong imaheng paraiso ng bayan, atrasado ang kabuhayan at lugmok sa hirap ang mamamayan ng Divilacan. Walang titulo o anumang katibayan sa pagmamay-ari ng lupa ang karamihan sa mga residente. Sinamantala ito ng mga panginoong maylupa, bukrurata-kapitalista at kanilang mga dayuhan at lokal na kasosyo para malawakang agawin ang lupa ng mga katutubo at magsasaka.

Dalawang engrandeng proyektong imprastruktura—ang 62-kilometrong Ilagan-Divilacan Road at Divilacan Airport—ang inilatag sa bayan para sa kapakinabangan ng mga mang-aagaw ng lupa. Inilalarawan na pag-“asenso” ang Ilagan-Divilacan Road, kalsadang nagdugdugdong sa bayan sa kabisera ng Isabela. Pero sa halip na asenso, delubyo ang hatid nito sa mamamayan nang matabunan ng *landslide* ang halos buong baryo at sakahan ng Barangay Sapinit noong 2019. Resulta ang *landslide* ng ginagawang konstruksyon na umuka sa gilid ng kabundukan at pumutol sa mga punong tatagusin ng kalsada. Ipinatagos ang kalsada sa protektadong gubatan ng Sierra Madre.

Noong 2013, nilinlang ng lokal na guberno ang Agta Sapinit Tribal Council para pahintulutan ang proyekto kapalit ng irigasyon, eskwelahan, *health center* at iba pang serbisyo para sa mga taga-Sapinit. Walang natupad ni isa sa mga pangakong ito. Ni hindi nakatulong ang daan sa mga magsasaka sa pagluluwas ng kanilang mga produkto. Sa halip, naging daan pa ito para padu-

lasin ang pang-aagaw ng lupa ng mga pulitiko at lokal at dayuhang negosyante sa mga sakahan ng mga residente. Kinatwang ng mga mang-aagaw ang malupit na 95th IB.

Taong 2014 nang marahas na dinemolis ng mga pulis at kampon ng noo’y gobernador na si Faustino Dy Jr ang komunidad ng Barangay Dipudo para bigyang-daan ang internasyunal na paliparan. Sinakop nito ang 112-ektaryang lupa sa tabingdagat at ang 8-ektaryang niyugan. Gamit ang kanyang pwesto, binraso ni Dy ang mga residente para ibenta sa kanya sa halagang ₱250,000 ang lupa at pumayag sa relokasyon. Inilipat sila ni Dy sa sulok ng gubat na sakop ng Northern Sierra Madre Natural Park (NSMNP). Nasa 14 kilometro ang layo nito mula sa dagat na pinagmumulan ng kanilang pagkain at kabuhayan.

Sadyang gusto rin ng estado na patayin sila sa gutom dahil ipinagbabawal ng NSMNP ang pagkakain ngin at pag-uuling na ikabubuhay sana ng mga inilipat doon. Kalaunan nilisan din ito ng mga magsasaka dahil sa kawalan ng kabuhayan. Walang hakbang na isinagawa para kilalaning barangay ang relokasyon. Hanggang ngayon, hindi tapos kahit ang maliit na *day care* sa lugar. Walang maayos na sistema sa tubig at iba pang pampublikong serbisyo. Ito ay sa kabila ng nakalaang pondo para rito na ₱3 milyon.



Hindi ligtas ang mga islang bahagi ng lupang ninuno ng mga Agta. Inagaw din ng mga Dy ang 24-ektaryang Honeymoon Island at ginawang pasyalan ng mga turista. Sinalaula nila ang sagradong libingan ng mga Agta doon na tinayuan ng mga negosyong *resort*, restawran at iba pang pasilidad. Gayundin ang ginawa ni Dy sa Gay Island, na “iniregalo” niya kay Jose Mari Antonez, isang upisyal ng Smartmatic.


Malaking panganib na maagaw ang lupa ng mga magsasaka matapos kanselahin ng Provincial Assessors Office ang mga deklarasyon ng lupa sa bayan at ideklara ang mga ito bilang “lupang pampubliko.” Mas mapapadali ang pangangamkam ng lupa na pinangangasiwaan mismo ng lokal na guberno. Ibinebenta ng mga ito ang primera klaseng mga lupa, laluna ang mga nasa baybay.

Ang “lupang pampubliko” na para sana sa mamamayan ay iilan lamang ang nakikinabang sa ilalim ng estadong umaaktong pinakamalaking panginoong maylupa. Mataagal nang lantad sa mga mamamayan ng Isabela, lalo na sa mga katutubong Agta ang iba’t-ibang iske-ma ng guberno sa pang-aagaw ng lupa. Sa nakaraan, nasa anyo ito ng pagtatatag sa NSMNP, National Greening Program at ngayon, sa Coastal Development Plan. AB

**₱378/kilo**

ng sibuyas noong Setyembre ang naitalang pinakamahal sa buong mundo. Mas mataas ito nang tatlong beses sa pandaigdigang abereyds na **₱85.14**.

**Pinagkunan:** *Global Product Prices*




**bilanggong pulitikal** ang inaresto mula nang maupo ang rehimeng Marcos Jr hanggang **Nobyembre 30**.

**Pinagkunan:** *Karapatan*

Espesyal na Ulat:

**MARUMING GERA  
LABAN SA MGA  
BATA**

Malalalang paglabag ng AFP at PNP sa mga karapatang-bata at espesyal na proteksyon sa mga bata sa ilalim ng internasyunal na makataong batas (2020-2022)

  
Nobyembre 20, 2022



Espesyal na ulat sa mga paglabag ng AFP at PNP sa karapatan ng mga bata. I-download mula sa **www.philippinerevolution.nu** at ilimbag para mabasa.



**₱15.6 B**

bakunang kontra-Covid-19 na **nasayang** noong Nobyembre dahil sa bagal at di sistematikong kampanya sa pagbabakuna.



**1/linggo**

ang kaso ng **pampulitikang pamamaslang** sa **Bicol** mula nang ipatupad ang **Memorandum Order No. 32** noong **Nobyembre 22, 2018**.


**MAHARLIKA  
WEALTHFUND**

pinakabagong **pakana** ng pamilyang **Marcos** para kopohin ang pondo ng mamamayan, kabilang ang pondong pensyon ng mga manggagawa at empleyado, sa tabing ng pamumuhunan.



**70%**

ng mamamayan sa US ang umaayon sa pagtatayo ng mga unyon. Sa ngayon, nasa 10.3% lamang ng mga manggagawang Amerikano ang may unyon.



**₱8.04**

kada kubiko metro

ang itataas sa singil sa tubig ng **Maynilad Water** simula **Enero 2023** kung matuloy ang hiling ng kumpanya.



# Ginintuang gulay

Tampulan ng kanyaw ng mga Pilipino nitong nagdaang mga linggo ang "ginintuang sibuyas" dahil sa taas ng presyo nito at ibang bilihin sa pamilihan. Pero paglilinaw ng mga magsasaka ng sibuyas sa Nueva Ecija, wala silang pakinabang sa animo'y pang-milyunaryong presyo nito, at sa katunayan ay lubog sila sa utang. Tulad nila, ito rin ang kalagayan ng mga magsasaka ng patatas sa Benguet.

Noong Setyembre, nasa ₱109.84 kada kilo ang presyo ng patatas sa Pilipinas. Hindi man ito ang pinakamahal sa mundo tulad ng sibuyas, malayong mas mataas ito sa bilingang ₱30 kada kilo mula sa magsasaka. Gayundin ang kaso ng repolyo, na ₱300 ang bentahan kada kilo, pero binibili lamang ng ₱50 kada kilo sa magsasaka.

Isa sa mga magsasaka (o hardinero) na ito si Jeremy, na nagtatanim ng patatas sa sariling pag-aaring 2,500 metro-kwadrang lupa o sangkapat ng ektaryang lupa kasama ng kanyang anim na kapatid. Ibinabagsak nila ang kanilang ani sa Nueva Vizcaya Trading Post, na apat na oras mula sa kanilang lugar.

Tatlong buwan ang haba ng isang siklo ng pagtatanim ng patatas. Sa kaso ni Jeremy, nakahihiram siya ng traktora sa kanilang tiyuhin kaya hindi siya nagbabayad ng upa nito. Gumastos siya ng pang-gasolina (₱1,360) at sinahuran niya ang opereytor para sa tatlong araw na trabaho (₱3,000). Sa halagang ₱70 kada kilo, ₱28,000 ang ginastos niya para sa 400 kilo ng semilya ng patatas. Nakaasa ang paglago ng patatas sa abono at pestisidyo kaya malaking bahagi ng kanyang pondo ay napupunta sa pagbili ng ipot ng manok (₱7,200) at urea (₱10,000), at samu't saring kahon at pakete ng

mga kemikal na pang-spray. Sa kabuuan, umaabot sa ₱39,700 ang gastos para sa pataba at pestisidyo.

Nitong taon, malaking pasakit kina Jeremy at katulad niyang hardinero ang pagsirit ng presyo ng urea mula ₱1,200 tungong ₱2,400, pagsirit ng presyo ng gasolina, pati na rin ang pagtaas ng mga presyo ng mga bilihin. Bukod pa ang mga ito sa dati nang sakit nila sa ulo na walang sagkang importasyon at ismagling ng mga gulay at ibang agrikultural na produkto (kadalasan mula sa mga bansang may subsidyo ng gubyrno ang produksyon pang-agrikultura) na lalong humila pababa ng presyo ng bilihan ng patatas mula sa kanila.

Sa kabuuan, umaabot sa ₱167,060 ang kabuuang gastos ni Jeremy kada siklo ng taniman. Pinalakalaking bahagi nito ang ₱86,260 na gastos para sa *farm inputs* na kalakhan ay imported. Nasa ₱21,000 ang gastos niya para sa transportasyon at dagdag na ₱4,500 para sa iba pang bayarin sa pagbyahe ng produkto (*toll fee, parking fee* at iba pa). Ang 10% ng kanyang kabuuang kita ay iaawas bilang bayad sa interes ng kanyang utang.

Sa kalkulasyon niya, nasa ₱37,300 ang halaga ng nagamit na lakas-paggawa (upahan at kapamil-

ya) para sa buong siklo—mula sa paghahanda ng lupa, pagtatanim, paghahakot ng tae ng manok, kada dalawang araw na pag-ispray ng pestisidyo, pag-ani hanggang delibery.

Sa presyong ₱30 kada kilo, nabenta ni Jeremy ang naaning 6,000 kilo ng patatas sa halagang ₱180,000. Menos lahat ng gastos, ₱12,940 lamang ang naiwan sa kanya, katumbas sa ₱143.78 kada araw. Wala pa itong kalahati sa itinakdang ₱300 na minimum na sahod sa rehiyon, at 13% lamang sa ₱1,100 nakabubuhay na arawang sahod.

Taun-taon, tiyak ang pagtataas sa gastos sa produksyon ng mga hardinero habang depende sa panahon at sa kapritso ng komersyante ang presyo ng kanilang ani.

Sa panahong lugin-lugi ang bentahan ng kanilang ani, nabubuhay si Jeremy at kapwa niya hardinero sa kaayusan ng mutwal na tungang tinatawag na "ub-ubbo" o kooperasyong walang katumbas na pera. Libre nilang ibinigay ang kanilang lakas-paggawa sa kapwa hardinero kapalit ng lakas-paggawa naman ng iba sa kanilang sakahan.

Nakatataba man ng puso ang kanilang pagdadamay, hindi nito maitatago ang pagdurusa at kahirapan nila at kanilang mga pamilya. Habang napipilitan silang magpakasapat sa maliit na kita, tiba-tiba sa tubo ang mga kumpanyang multinasyunal na nagbebenta ng napakamahal na mga *farm input*, usurerong naghuhuthot ng napakataas na interes, mga komersyanteng bumabarat sa kanilang ani at gubyrnong nagtutulak ng importasyong lalong humihila sa presyo ng mga produktong agrikultural.

Para sa buong kwento ng mga hardinero ng patatas sa Ifugao, basahin ang "Ang pakikipagsapalaran ni Jeremy Hardinero" sa [www.philippinerevolution.nu](http://www.philippinerevolution.nu).



# Kabataang Makabayan: Balon ng rebolusyon sa Negros

Nakatayo sa Katrina (di tunay na pangalan), isang baryo sa Negros, ang balangay ng Kabataang Makabayan na unang itinatag noong 2008. Nabuo ang balangay na ito sa panahong napapalibutan ang barangay ng mga detatsment ng CAFGU at naglipana ang masasamang elemento sa mga baryo.

Matindi ang kahirapan sa Katrina dahil sa atrasadong produksyong pang-agrikultura. Karamihan sa mga magsasaka rito ay saop o kasama ng mga panginoong maylupa, mayaman at mataas na gitnang magsasaka. Kulang na kulang ang kanilang kita dahil sa umiiral na partehang tersyuhan na pabor sa may-ari ng lupa. Dahil sa kahirapan, hindi nila kayang pag-aralin ang kanilang kabataan.

Para makadagdag sa kita ng kanilang mga pamilya, nagpapa-alipin ang kabataan ng Katrina bilang mga katulong mula sa murang edad na 15-taong gulang. Noong 2008, halos 300 sa kanila ang lumuwas sa mga syudad para mamasukan sa mga temporaryong mga trabahong mababa ang sahod at walang benepisyoy. Dumayo sila sa Metro Manila, Cebu, Panay at Bacolod City. Hindi iilan sa kanila ang naging biktima ng prostitusyon, pagmamaltrato at pang-aabusong sekswal.

Dahil sa mapait na mga karansang sinapit nila, marami sa mga magulang ang hindi na pumayag na umalis ang kanilang mga anak para magtrabaho sa mga syudad. Inenganyo na lamang silang magtanim ng mais, halamang-ugat, saging at iba pang pananim para may tiyak na makakain.

Maagang bahagi ng 2008 nang itayo ang Pambansang Katipunan ng Magbubukid sa Katrina. Tinipon at kinausap ang kabataan ng organisadong mga magulang para maging katuwang nila sa mga rebolusyonaryong gawain. Unang binigyan ng pag-aaral na Maikling Kurso sa Lipunan at Rebolusyong Pilipino ang walong kabataang maaasahan at walang

kriminal na rekord. Mula rito itinayo ang grupong pang-organisa ng Kabataang Makabayan.

Inatasan ang grupo na organisahin ang ibang kabataan sa baryo upang paunlarin ang produksyon at maglunsad ng mga pakikibakang antipyudal. Hinimok din silang sumali sa *dagyaw-alayon*, isang anyo ng pagtutulungan o bayanihan.

Naging malimit ang pakikisalamuha ng kabataan at ng mga Pulang mandirigma. Regular na tinatasa ang kanilang mga gawain kabilang ang mga pagsasanay pangkultura at pagtuturo sa PaDePa (Pambansang Demokratikong Paaralan). Sa kalaunan, pinalahok sila sa mga pag-aaral ng kursong Pampartido at maiikling kursong pulitiko-militar.

Bahagi ng kanilang tungkulin ang pagtatanghal sa mga aksyong masa. Sa mga larangang gerilya, pinasisigla nila ang mga pagdiriwang ng mga anibersaryo ng Partido Komunista ng Pilipinas, Bagong Hukbong Bayan, National Democratic Front of the Philippines at Kabataang Makabayan. Sila rin ang nag-aasikaso sa mga parangal sa mga rebolusyonaryong martir.

Ang mga kasaping nag-aaral ay inatasan ng organisahin ang kapwanilang mag-aaral. Nanghikayat sila sa mga estudyante na lumahok sa

isinagawa nilang mga pangkulturang pagtatanghal sa paaralan. Pinaliwanagan nila maging ang kanilang mga guro.

Dahil sa kasigasigan nila at ng taumbaryo, naitayo ang komiteng pang-organisa sa baryo noong Disyembre 2008 na may higit 100 kasapi. Lumawak ito sa higit 10 sityo mula sa anim sa umpisa. Kasunod nito naitayo na rin ang tatlong balangay sa kalapit na mga baryo.

Nang mangyari ang engkwentro sa pagitan ng BHB at ng AFP sa Katrina sa bandang simula ng dekada 2010, naengganyong sumapi sa hukbong bayan ang halos laking-platung kabataan. Sa sumunod na mga taon, naitayo na rin ang mga ganap na samahang masa sa lugar. Napataas ang antas ng organo ng kapangyarihang pampulitika at ang lokal na yunit gerilya sa baryo. Naitalaga mula sa mga samahan ang mga kasapi ng yunit milisya at pananggol-sa-sarili. Naitayo ang komiteng rebolusyonaryo sa baryo. Karamihan sa kanila ay naging mga kasapi ng Partido.

Noong 2018, nanalasa sa Katrina ang brutal na kampanyang panunupil ng rehimeng US-Duterte. Di iilan ang pinatay at iligal na inaresto. Dahil dito, puu-puo muli ang sumapi sa BHB. Noong 2019, nakapagpalitaw ang Katrina ng mga kadre ng Partido at Pulang mandirigma na naitalaga sa mga estratehikong lugar at ibang larangang gerilya sa isla. Walo sa mga mandirigma nito ang naging mga rebolusyonaryong martir.

Sa okasyon ng ika-58 anibersaryo ng Kabataang Makabayan ngayong taon, buong ipinagmamalaki ng mamamayan ng Katrina ang ambag nilang kabataan at Pulang mandirigma sa pagpapatuloy ng rebolusyon hindi lamang sa kanilang lugar, kundi sa buong isla.

